



ANG

# Paghimakas

Pabayagan sang Partido Komunista sang Pilipinas ★ Isla sang Negros

Ginaubayan sang Marxismo-Leninismo-Maoismo NOBYEMBRE 2022

## Pasidungog para kay Ka Juanito Magbanua, baganihan sang pumuluyo kag rebolusyon

*Rehiyunal nga Komite sang Partido sa Isla sa Negros  
Oktubre 2022*

*"Pasidungog..." sundan sa pahina 2*

**AP** ★ *Kaundan*

Pasidungog para kay Ka Juanito Magbanua, baganihan sang pumuluyo kag rebolusyon, p1  
Kabahin sa brutal nga pagpatay kay Ka Juanito Magbanua, p6  
"Top scorer" ang 303rd Brigade sa pagbayolar sang tawhanon nga kinamatarung, p8  
Buhi ang rebolusyonaryo nga kahulugan ni Ka Juanito Magbanua nga magbun-ag sang mas madamu pa nga rebolusyonaryo nga pamatan-n, p10

"Pasidungog..." *halin sa pahina 1*

ANG REHIYUNAL NGA KOMITE SANG Partido sa Isla sa Negros, ang tanan sini nga kadre kag myembro sang Partido, mga kumander kag Pulang hangaway idalum sa *Apolinario Gatmaitan Command-New People's Army Negros Island Regional Operational Command* (AGC-NPA) kag ang mga rebolusyonaryo nga pwera sa isla nagahatag sa amon pinakamataas nga pasidungog sa kay Kaupod Romeo Nanta, mas kilala sa iya nga ngalan sa paghimakas nga Ka Juanito Magbanua, anay tigpamaba sang AGC-NPA. Ginapaabot man namon ang amon simpatiya sa nagakasubo nga pamilya ni Ka Juanito kag sa masang anakbalhas nga mga mamumugon kag mangunguma nga nagapalangga sa iya.

Si Ka Juanito Magbanua, 64 ang edad, masami nga ginatawag sang masa nga Ka Juaning, isa ka myembro sang rehiyunal nga komite sang Partido sa isla sa Negros. Brutal siya nga ginpatay sang mga pasista nga suldado sang *94th Infantry Battalion* pagkatapos siya gindakup kag gintortur sang Oktubre 10 sa Sityo Medel, Barangay Carabalan, syudad sang Himamaylan, Negros Occidental.

Ang nagmasakit nga si Ka Juaning halos indi armado kag wala sa posisyon para makig-away. Isa siya ka *hors de combat* ukon wala sang kapasidad nga magbato. Base sa Internasyunal nga Makitawhanon nga Laye (IHL), dapat kabigon siya nga binilanggo sa gyera kag ihatag ang tanan nga kinamatarung suno sa *Protocol I* sang mga Kasugtanan sa Geneva.

Sa pila na ka tuig, iya nga ginbatas ang malala nga atraytis, alta-presyon kag iban pa nga mga malala nga balatian samtang nagapatuman sang nagkalain-lain nga hilikuton kag re-

sponsibilidad sa rebolusyonaryo nga kahublagan.

Agud tagaan rason ang gilayon nga pagpatay sa iya, ang 94th IB idalum sa direkta nga pagdumala sang pasista nga hepe sang *303rd Brigade* kag manughimo sang mga peke nga balita nga si BGen. Inocencio Pasaporte nagagamit sing pasulitsulit nga drama sa peke nga engkwentro.

Antes ang bangis nga pagpatay kay Ka Juaning, natabu ang paslaw nga reyde sang tropa sang 94th IB sa isa ka yunit sang MCC (*Mount Cansermon Command*) nga temporaryo nga nagkampo sa sina nga erya sadtong Oktubre 6. Ang amu nga yunit sang NPA nagatubang sa nagpang-atake nga pwera sang estado sa 30 minutos nga linukpanay kag nakapatay sa indi sa magnubo sa anum nga kaaway nga suldado. Samtang wala sang naangkon nga kaswalidad ukon bisan gamay man lang nga halit ang Pulang hangaway kag nakatibawas ini nga makaguwa nga hilway halin sa pag-insirkulo sang militar.

Mas labi pa nga nahuy-an ang 94th IB sang isa sa ila mga nagalagas nga kulom na-ambusan sang yunit sang NPA nga nakapatay sang duha ka suldado kag nakapilas sang iban pa nga anum suno sa ginbalita sang midya kag gin-ako mismo ni Pasaporte. Apang suno sa mga saksi, walo ka suldado ang napatay sa sina nga opensiba, sa diin duha ang gilayon nga napatay kag ang iban sa ospital na.

Agud indi mahuy-an, wala huya nga gingamit ni BGen. Pasaporte ang kamatayon ni Ka Juaning bilang tropiyo sa gyera kag wala pulos nga nagawakal bahin sa "nagahilapit nga pagkawasak" sang NPA sa Negros.

"Pasidungog..." *sundan sa pahina 3*

*Ang mga rebolusyonaryo mapatay man sa gera, apang ang kalayo sa rebolusyon bisan san-o indi mapalong ilabi na sa tunga sang tuman ka lala nga permanente nga krisis nga gintuga sang dunot nga mala-kolonyal kag mala-pyudal nga nagahari nga sistema kag sang nagatagumatayon nga pangkalibutanon nga kapitalista nga sistema sa diin ini napaidalom.*



NOBYEMBRE 2022

ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@protonmail.com



negrosrevportal.wordpress.com

Si Kaupod Juaning isa ka baganihan sa rebolusyonaryo nga kalihukan sa isla sang Negros. Isa siya ka maayo nga halimbawa sa paghimakas nga ginlunsar sang mayorya ng ginhimuslan, ilabi na sa hanay sang masa nga mangunguma, mamumugon sa kampo kag imol sa kasyudaran. Wala siya nagaserbisyo para lang sa interes sang pipila o sa iya nga kaugalingon. Bilog tagipusuon niya nga gin-alagaran ang pumuluyo sa handum nga hilwayon ang ginhimuslan sa bilog pungsod.

Ginhanduraw sang mga kaupod kag masa ang iya nga mga inagihan bilang isa ka kadre sang Partido nga maayo nga gin-aplikar ang Marxismo-Leninismo-Maoismo sa praktika sang rebolusyon, kag bilang isa ka Pulang kumander nga hugot nga nag-uyat sa sandigan nga prinsipyo kag disiplina sa iya nga mga hulag.

**Halin sa "Pula nga pagsaludo kay Ka Juanito Magbanua!" sang Roselyn Jean Pelle Command-New People's Army Northern Negros Guerrilla Front**



"Pasidungog..." halin sa pahina 2

Ang kamatayon sang isa ka lider ukon kadre sa pagkamatuod daku nga kadulaan sa rebolusyonaryo nga kahublagan, apang ang rebolusyon isa ka hilikuton sang masa kag mas madamu nga isip sang mga rebolusyonaryo ang magtuhaw kag magpadayon sa wala pa matapos nga misyon sang mga namartir nga kaupod kaangay ni Ka Juaning kag mag-sulong sa inaway banwa padulong sa bag-o kag mas mataas nga mga lebel.

Nabun-ag si Ka Juaning sadtong Mayo 29, 1958 sa Proper Tabaw, Valladolid, Negros Occidental. Nagakabuhi ang iya nga pamilya sa magamay nga kita halin sa pagbaligya sang *native* nga kape kag bingka. Sang lamharon pa, handum niya

ang mangin isa ka arkitekto apang tuman ka imol ang iya pamilya agud masustener ang iya pag-eskwela.

Nagsulod siya sa *Philippine Navy* bilang *Marine* kag nades-tino sa Mindanao apang nagwa pagkatapos sang tatlo ka tuig nga ginakapoy na sa lapnagon nga kagarukan, kurapsyon, wala sang demokrasya, pagpang-abuso kag pasista nga kultura kag mga batasan sa institusyon militar.

Sa iya banwa, baskug ang kontra-Marcos nga sentimento kag madamu sa iya mga suod nga abyan mga myembro sang Kabataang Makabayan (KM). Nag-upod si Ka Juaning sa mga pagtuon kag sa mga lokal nga protesta kontra sa pasista nga diktadurya. Nagpatalum ini sa iya pulitikal nga panindugan kag nagpabakud sa iya komitment

para sa rebolusyonaryo nga sosyal nga transpormasyon.

Nagsumpa siya sa Partido sang 1983, sa panahon sang naga-indakal nga kontra-pasista nga bagyo nga pagkatapos sang tatlo ka tuig napatalsik ang diktador nga si Marcos Sr sa isa ka popular nga pag-alsa sang pumuluyo. Sa ulahi nga bahin sang dekada 80, nagsulod siya sa isa ka yunit partisano nga naga-opereyt sa syudad sang Bacolod. Ang iya nga yunit lakip sa pinaka-una nga nagsabat sa panawagan sang Partido para sa pagpanadlong. Siya nangin *full-timer* sa NPA nga nakabase sa kaumhan sang 1994.

Sa kabilogan, iya nga gin-hatag ang 28 ka tuig sang iya kabuhi bilang Pulang hangaway kag kumander, kag 39 ka tuig

"Pasidungog..." sundan sa pahina 4

*"Pasidungog..." halin sa pahina 3*

bilang myembro kag kadre sang Partido.

Pagsugod sang 2000, nag-serbi siya bilang kumander sa mga larangan gerilya sa *South Central, North* kag *Southwest* Negros. Sang ulihi, gin-asayn siya nga magdumala sa *ord-nance* kag treyning sa *Regional Military Staff*. Kag sa 2010, siya ang gintalana bilang tigpamaba sang AGC-NPA.

Nauntat ang iya rebolusyonaryo nga hilikuton sang nadakup siya sa Cadiz City sadtong 2011. Pagkatapos makagwa sa priso-han, gilayon siya nga nagbalik sa nagapanguna nga daloy sang paghimakas kag nagpadayon sa hilikuton.

Bilang Pulang kumander, iya ginpamunuan ang pila ka tak-tikal nga opensiba. Ang pinaka-

tumalagsahon amu ang ambus sa nagpatrolya nga CAFGU sa Sityo Namulo, Barangay Santol, Binalbagan, Negros Occidental sang Pebrero 2000 sa diin duha ka CAFGU kag isa ka regular nga army ang napatay kag isa ka katapu sang CAFGU ang napi-lasan; ang ambus sa Sityo Bulod Barangay Carabalan, Himamay-lan City sadtong Agosto 2000 nga nagpatay sa 17 ka kaaway; ang reyd kontra sa mga bandido nga RPA sa Barangay Biao, Binalbagan sang tuig 2002; kag ang reyd sa CAFGU detatsment sa Barangay Mahalang, Himamay-lan City sadtong Pebrero 2004 nga nakakuha sang apat ka mataas nga kalibre nga armas.

Bilang rehiyunal nga tig-pamaba, nagatinguha si Ka Juaning nga magbuyagyag, maghamulag kag mag-atubang paagi sa bay-lohanay sang pahayag sa mga panatiko kag manug-torse sang kamatuoran sang rehimen US-Du-terte ilabi na sa isla sang Negros. May ka-angay nga kapagsik, ginapaathag man niya sa mga Negrosanon ang ila nga mga pag-antus nga naka-ugat sa mga sandigan nga problema sang sosye-

dad Pilipino—imperyalismong US, pyudalismo kag burukrata kapi-talismo—nga tuman ka athagon sa monocrop nga ekonomiya sang kalamay sa Negros.

Naangkon ni Ka Juaning ang kaakig sang laban sang mga pasista nga opisyales sang *Philip-pine Army Visayas Command, 3rd Infantry Division* kag mga brigada kag batalyon sini tungod sa iya wala kahadlok nga opensiba sa propaganda batok sa ila nga mga kampanya sang disimpormasyon kag saywar. Ma-isugon niya nga gin-away ang mga reaksyunaryo nga tig-pamaba kag maakigon sa mga paglapas sang tawhanon nga kinamatarung ilabi na sa pag-pamatay sa mga mangunguma sa Negros.

Matigdas man si Ka Juaning bilang tigpamaba sang NPA, apang sa mga kaupod kag mga masa siya malipayon, mapa-inubuson kag dali mapalapitan. Bisan sin-o nga kaupod dasig lang makapamangkot ukon maka-is-torya sa iya sa bisan ano nga hambalanon. Permi siya nga mapinalanggaon kag nagakaba-laka sa kaayohan sang mga kaupod kag nagapangita sang mga pamaagi para makabulig sa

*"Pasidungog..." sundan sa pahina 5*

*Indi mapanginwala nga sa sulod sang 39 ka tuig ginhalad ni Ka Juaning sa pumuluyo kag sa rebolusyon ang iya kabuhi. Ginhatagan sang tingog ang ginapigos kag ginahimuslan ilabi na ang masang mangunguma kag mamumugon sa kampo nga direkta nga biktima sang pyudal nga pagpanghimulos. Tubtob sa iya nga katapusan nga tingog, ginpangapinan niya ang interes sang malapad nga pumuluyo.*

*Halin sa "Pulang Saludo kay Ka Juanito Magbanua, Tingog sang Pumuluyo kag Hukbo!" sang Armando Sumayang Jr Command - NPA Southwest Negros Guerrilla Front*





"Pasidungog..." halin sa pahina 4

ano man kag kung san-o tubtub sa iya masarangan. Para sa mga masa, isa siya ka manugluto, *electrician*, *acupuncturist*, musikero, kag iban pa.

Ihatag naton ang pinakahugot nga pulang saludo kay Ka Juanito Magbanua, baganihan sang Negrosanon kag pumuluyong Pilipino. Ang iya paghalad sang iya kabuhi sa rebolusyon kag pag-alagad sa pumuluyo magserbi nga aton dalayon nga inspirasyon sa pakig-away para sa pungsodnon kag pangsosyedad nga kahilwayan. **AP**

*Isulong paabante ang inaway banwa sa inspirasyon sa aton rebolusyonaryo nga martir kag baganihan!*

*Mabuhay ang Communist Party of the Philippines!*

*Mabuhay ang New People's Army!*

*Mabuhay ang National Democratic Front of the Philippines!*

*Mabuhay ang masang pigos kag ginahimuslan!*



NegrosRevPortal

Diin na ang ginasugid ni Arevalo kag Pasaporte nga naga-oberbar ini sang mga laye sang gyera? PASISTA, MERSEMARYO kag REAKSYONARYO ang matuod nga tatak sang AFP, PNP kag iban pa nga armadong pwersa sang mapintas nga estado partikular na sang terorista nga rehimen US-Marcos II.

"Mapatay man ang REBOLUSYONARYO, indi ang REBOLUSYON!" kaangay lang sang mapintas nga pagpatay sang militar kay Ka Juanito Magbanua. Madula man si Ka JM apang ang iya gintudlo sa masang ginahimuslan kag ginapigos ilabi na sa mga Negrosanon magpabilin.

Ini ang indi madula sa kaisipan sang mga mangunguma, mamumugon, kabataan, propesyunal kag iban pa nga sektor. Ang buhi nga inagihan kag kinaalam ni Ka JM sa pagrebolusyon, ang sulundon kag inspirasyon sang mga isganan nga kadre sang Partido, Pulang kumander, Pulang hangaway, mga rebolusyonaryong masa ilabi na sang mga pamatan-on kag kabataang estudyante upod sa sandigan nga alyansa sang sahing mangunguma kag mamumugon.

**Halin sa "Planado nga Pagpatay kay Ka Juanito Magbanua, Ginakondenar!" sang Leonardo Panaligan Command - New People's Army Central Negros Guerrilla Front**

## Kabahin sa brutal nga pagpatay kay Ka Juanito Magbanua

*Pahayag sang Apolinario Gatmaitan Command - New People's Army  
Negros Island Regional Operations Command*

ISA KA BRUTAL NGA PAGPATAY, indi engkwentro ang natabu Oktubre 10 sang hapon sa Sityo Medel, Barangay Carabalan, Himamaylan City, Negros Occidental. Si Ka Juanito Magbanua (Romeo Nanta), tigpamaba sang AGC-NPA Negros, ang gilayon nga ginpatay sang mga elemento sang 94th IB pagkatapos nga nadakpan sa eryl.

Idalum sa mga laye sang gyera, dapat ginkilala ang estado ni Ka JM bilang *hors de combat* (mga kombatant nga wala sang ikasarang nga makig-away). Dapat ang iya kinamatarung respetohon kag trataron bilang tawo.

Pasulit-sulit si BGen. Pasaporte nga nagasabwag sang ka-

butigan agud hinabonan ang nakomiter nga war crimes sang *Philippine Army* kag subongman taguon ang kapaslawan sang ila kontra-insurhensya nga kampanya.

Paano nga may natabo nga engkwentro nga may ara lang sang apat ka lupok kag mabatian ang hinibi sang bata halin sa palibot diin nagatenir si Ka JM? Paano natabo nga may engkwentro nga wala man sang yunit sang NPA sina nga panahon sa eryl?

Si Pasaporte padayon nga ginapunggan ang kamatuoran sa pumuluyo kag ginapatiyog ang istorya nga pabor sa iya.

May ginabatyag nga *hypertension* kag *arthritis* si Ka JM

amu nga ginpili niya nga magpabilin sa Sityo Medel agud hugot nga magmonitor sa sitwasyon sang masa samtang ang yunit sang NPA nakamaniobra palayo sa sina nga eryl pagkatapos sang Oktubre 6 nga engkwentro.

Sa katapusan nga pagkontak ni Ka JM sa mga kaupod, nagakabalaka siya sa pagpa-idalum sang mga barangay sa nabukid nga bahin sang Himamaylan sa *martial law*. Luyag niya man tani nga maistorya ang mga *media* agud ibuyagyag ang ginhimo nga brutalidad sang mga pwersa sang estado kag sabton ang madamu nga ka-

*"Kabahin..." sundan sa pahina 7*



"Kabahin..." halin sa pahina 6


butigan nga ginalibod sang AFP apang wala ini gintugot sang sitwasyon.

Ginakasubo ang ini nga hitabo sa tanan nga kaupod kag rebolusyonaryo nga pwersa, mga abyan kag pamilya, kag ilabi na sa mga ginahimuslan kag ginapigos nga masa, indi lang sa Negros pati na sa bilog pungsod. Lubos nga nahangpan ni Ka JM ang iya ginsumpaan nga alagaran ang pumuluyo kag hangkat sa rebolusyonaryo nga hanay nga sundon ang iya ehemplo kag bug-os tagipusuon nga ipadayon ang rebolusyonaryo nga paghimakas.

Ang AGC-NPA Negros upod ang bilog nga rebolusyonaryo nga kahublagan nagasumpa nga tagaan hustisya ang brutal nga pagpatay kay Ka Juanito Magbanua kag ang tanan nga biktima sang terorismo sang estado nga ginhimu sang AFP kag PNP paagi sa pagpatuman sang sinsin kag lapnagon nga inaway gerilya base sa nagadalum kag nagalapad nga baseng masa.

Ang rebolusyonaryo nga kahublagan sa Negros kinahanglan maglunsar sang mabaskog nga pagbato sa nagalala nga pagpamigos kag pagpanghimulos sa isla kag lab-uton ang mga kadalag-an sa armado nga paghimakas, agraryo nga rebolusyon kag pagtukod sa mga organo sang gahum pangpu-litika.

Kaangay sa pagtakop ni Ka Juanito Magbanua sa iya mga pahayag, MABUHAY ANG MASANG PIGOS! **AP**



Samtang ang mga panawagan para sa hustisya para kang Ka Juanito ug sa tanan nga rebolusyonaryong martyr nag-alingawngaw sa mga dinaogdaog, ang rehimeng US-Marcos II makakita lang sa iyahang kaugalingon nga mas nagkalayo sa katawhan. Tungod sa tatak niini nga grabeng disimpormasyon ug pinasagad nga kamangtas, ang wala'y pulos nga mga pagpatay sa estado sa mga inosenteng sibilyan o mga wala'y ikasukol nga mga rebolusyonaryo gabuling lang og samot sa hugaw na daan nga reputasyon sa rehimen.

Kuyog sa mga luha ug kolektibong aligutgot sa katawhan batok sa estado nga ang nahibaloan lamang ang pagpatay sa ilaha ang hagit sa paglunsad ug pagsukol sa mga kapritso sa mga dagkong agalong yutaan ug komprador kuyog ang ilahang mga katugbang nga burukrata.

Ang pinakatataw nga pagpahayag sa hustisya naggikan sa sumbohan sa pusil. Aron tiunay nga palanugon ang tingog ni Ka Juanito Magbanua, kinahanglang pilion sa katawhan ang dakong pag-uswag padulong sa tibuok kasingkasing nga pag-alagad sa rebolusyon.

**Halin sa "Ipadayon ang kabilin ni Ka Juanito Magbanua! Salmot sa armadong pakigbisog, alagaran ang rebolusyon!" sang Rachelle Mae Palang Command-New People's Army Southeast Negros Guerrilla Front**



# “Top scorer” ang 303rd Brigade sa pagbayolar sang tawhanon nga kinamatarung

*Ka Bayani Obrero  
Spokesperson  
National Democratic Front - Negros*

SAMTANG NAGALALA ANG PAGLAPAS SANG kinamatarung sibil sa isla sang Negros, naga-alagwa man ang pagpalapta sang peke nga balita nga nagahalin mismo sa mga opisyal sang militar kaangay sang kagarukan nga pagbinutig nila Pasaporte sang 303rd Brigade kag Arevalo sang 3rd ID, kag asta sa pinakamataas nga opisyal sang *Philippine Army* nga si Lt. Gen. Romeo Brawner Jr. Ginatapna nila ang kamatuoran kag ginalibod ang kabutigan paagi sa mga peke nga mga engkwentro, peke nga NPA nga nagsurender, ginrecycle nga mga nakuha nga kagamitan sang NPA agud mgamit sa *photo-ops*, kag peke nga mga *accomplishment* sa kadalag-an sang militar samtang ginapaguwa nga mahuyang kag mawasak na ang NPA.

Ginadayaw sang *Philippine Army* bilang mga *accomplishment* nga nagakadapat hatagan sang “*streamer award*” ang mga pagpatay sa mga mangu nguma, paglapak sa tawhanon nga kinamatarung sang pumuluyo kag paglapas sa mga laye sang gyera.

“*Top scorer*” ang *303rd Brigade* sa daku nga salabton sa tanan nga mga pagbayolar sang tawhanon nga kinamatarung idalum sa pagpamuno nila Pasaporte kag Arevalo. Gina-into lang nila ang ila kaugalingon bangud maathag sa pumuluyo ang kamatuoran nga mas nagadamu ang mga biktima sang kalakasan kag kapintas nga tuga sang militarisasyon.

Idalum sa kampanya kontra-insurhensya sang reaksyonaryo nga hubon, sa ini nga tuig 2022, siyam ka rebolusyonaryo ang ginpatay sang mga pasista nga militar bisan sa ila estado nga *hors de combat* (ukon wala ikasarang nga magbato). Pinakaulihi nga panghitabo ang wala kaluoy nga pagpatay kay Ka Juanito Magbanua. Gindakup kag ginpatay si Ka Juaning sang pasistang militar sadtong Oktubre 10, 2022 sa Sityo Medel, Barangay Carabalan, Himamaylan City, Negros Occidental.

*'''Top Scorer'...' sundan sa pahina 9*

.....



*Ginakasubo sang bilog rebolusyonaryo nga pwersa ang natabu nga kamatayon ni Ka JM. Pero ini nga kamatayon mas magahatag pa sang inspirasyon sa bilog rebolusyonaryo nga hanay nga mas mangin determinado kag mangin resolbado pa nga ilunsar ang armado nga paghimakas paagi sa sinsin kag lapnagon nga inaway gerilya base sa nagadalom kag nagalapad nga baseng masa.*

*Ang bilog yunit sang MCC-NPA magapanikasog nga maangkon ang hustisya sa pagpatay kay Ka JM paagi sa paglunsar sang mga taktikal nga opensiba, rebolusyon agraryo kag pagtukod sang baseng masa.*

*Mabuhay si Ka Juanito Magbanua!*

***Halin sa "Hustisya para kay Ka Juanito Magbanua" sang Mount Cansermon Comman - New People's Army South Central Negros Guerrilla Front***





"'Top Scorer'..." halin sa pahina 8

Ang berdugo nga militar nagbayolar man sang kinamatarung sang mga *hors de combat* kaangay nila Virgilio Marco Tamban II (Ka Bedam) kag Ben Jack Rueles (Ka Yuhan) nga ginpatay sang 62nd IB sa Barangay Amin, Isabela, Negros Occidental samtang nagakatulog sa payag sang masa. Sila ni Elbert Nicolas (Ka Carding) kag Jessa Quillano (Ka Clea) ang mag-asawa nga gindakup kag gintortur kag ginpatay sang 94th IB sa Sityo Kulihaw, Barangay Buenavista, Himamaylan City. Ginmasaker man pagkatapos nadakpan sang 94th IB sa Sityo Kalunakon, Barangay Santol, Binalbagan, ang apat ka nagmasakit nga NPA nga sila ni Nikka de la Cruz (Ka Chai), Roel Ladera (Ka Jack), Alden Rodriguez (Ka Rocky) kag Roel Deguit (Ka Caloy).

Ini sila tanan ginpamatay sang militar sa mandu sang 3rd ID kag 303rd Brigade nga nagpamatuod sang daku nga salabton sa bayolasyon sa *International Humanitarian Law* (IHL) kag sa *Geneva Conventions Protocol I*.

Dugang pa, sa kapaslawan nga wasakon kag pahuyangon ang NPA kag ang rebolusyonaryo nga kahublagan ginpaluntad ang kaangay sang *martial law* sa pagpa-ebakwet sa masobra 18,000 ka pumuluyo sa mga barangay sang Himamaylan City kag Binalbagan, paglock-down sa pumuluyo, pagimposar sang *curfew*, kag ilabe na sa pagpangibabaw sang kontrol sang militar sa LGU, DSWD kag sa mga opisyal sang barangay. Tuhtub subong, wala untat ang militarisasyon indi lang sa Himamaylan City kundi sa bilog isla sang Negros.

Nagsala ang mga berdugo nga militar nga sa

ila pagpatay kay Ka Juaning maghuyang ang rebolusyonaryo nga kahublagan.

Ginakilala sang tanan nga rebolusyonaryo nga kaupod, masa, aktibista, mga abyan, alyado, mga patriyotiko kag demokratiko nga pwera si Kaupod Juanito Magbanua (Romeo Nanta) sa iya pagkabaganihan. Ginhalad niya ang iya kabuhi nga wala sang pangduha-duha para sa rebolusyon kag masang pigos.

Si Kaupod Juanito Magbanua, bilang tigpamaba sang NPA Negros, ang nangin tingog sang rebolusyonaryo nga kahublagan kag sang masang pigos sa isla sang Negros. Ang iya pag-alagad sa pumuluyo magapabilin nga buhi kag inspirasyon sa tanan nga NPA kag rebolusyonaryo nga masa sa Negros nga determinado nga ipadayon ang iya nasugdan tubtob maangkon ang matuod nga kahalwayan kag kadalag-an.

Ang NDF-Negros nagapanawagan sa tanan nga Negrosanon nga maghiliugyon sa pag-atubang kag pamatukan ang nagalala nga militarisasyon kag pasismo sang estado sa idalum sang rehimen US-Marcos II. Ginapanawagan man sa mga lokal nga pangginahum (LGU) kag mga barangay opisyal nga manindugan nga itib-ong ang *civilian supremacy* kag manindugan sa pagdependa sa tawhanon nga kinamatarung kag sa ekonomikanhon nga interes sang pumuluyo nga ginalapas sang militar kag NTF-ELCAC.

Subong man ginapanawagan sa mga *peace-loving* nga pumuluyo, tawong simbahan, mga abugado kag midya kag iban pa nga sektor sang sosyedad nga makigbahin sa pagpanawagan para sa matuod nga kalinong base sa hustisya sosyal. **RP**

## Buhi ang rebolusyonaryo nga kahulugan ni Ka Juanito Magbanua nga magbun-ag sang mas madamu pa nga rebolusyonaryo nga pamatan-on

*Mensahe sang Kabataang Makabayan - Negros*

MABASKOG NGA GINAKONDENA SANG KABATAANG Makabayan (KM) – Negros ang brutal kag indi makatarunganon nga pagpatay kay Ka Juanito Magbanua (Romeo Nanta) sang mga pasista nga tropa sang 94th IB. Si Ka JM ginpatay sadtong Oktubre 10, 2022, alas 5:45 sang hapon sa Sityo Medel, Barangay Carabalan, Himamaylan City.

Ginpagwa sang mga berdugo nga may engkwentro nga natabo agud hinabonan ang ila paglapas sang *Protocol I* sang *Geneva Conventions* kag *International Humanitarian Law*. Ila nga gindakop, gintortyur, kag ginpatay nga wala sang may ibato si Ka JM nga kon tani ginkabig bilang *hors de combat* tungod wala ini sa posisyon nga depensahan ang iya kaugalingon.

Ang KM-Negros nagahatag sang pinakamataas kag mapula nga pagsaludo kay Ka Juanito Magbanua. Sulod sa 39 ka tuig bilang rebolusyonaryo nga nagsulong sa interes sang malapad nga masa nga ginapigos, ilabi na sang sahing pesante kag mamumugon, ginhatag ni Ka JM ang iya kabuhi bilang tigpamaba sang NPA sa Negros kag bilang isa sa mga nagapanguna nga kadre sang Partido sa isla. Ginhalad niya ang iya oras, ihibalo, pag-alagad, kag kabuhi para awayon kag lutuson ang imperyalismo, pyudalismo kag burukrata kapitalismo, kag itaas pa ang lebel sang ihibalo sang masa kaangot sa pagpanghimulos sang mga nagahari nga agalon mayduta kag dalagku nga kompra-

dor burgesya, kag sa mapiguson nga gobyerno nga padayon nga ginalumos ang masa sa kapi-gaduhon.

Ang pagkamatay ni Ka JM ginakasubo sang KM-Negros kag sang bilog nga rebolusyonaryo nga pwersa. Apang sa pihak sini, ang iya ginbilin nga palanublion ang magaserbi nga inspirasyon sang rebolusyonaryo nga hanay agud padayon nga isulong ang rebolusyonaryo nga handum nga mabawi ang duta sang masa halin sa mga agalon mayduta kag libre ini nga ipanagtag, makuha sang mga mamumugon ang makasahi nga pagpamuno halin sa dalagku burgesya komprador kag sa ila burukrata kapitalista nga gaway, kag mapalayas ang imperyalista nga mga

pungsod nga nagahuthot sa manggad kag ikasarang sang mga Pilipino.

Ang pagdemanda sang hustisya para sa tanan nga biktima sang kapintas kag inhustisya ang matuod nga mahimu kon padayon kita nga magmuklat, mag-organisa, kag magpahulag sa malapad nga masa. Bangud paagi sang pagsulong sang pungsodnon demokratiko nga rebolusyon, aton mahimu kag mahatag ang matuod nga hustisya para sa mga kaangay nga martir ni Ka JM.

Manubli sa ginbilin nga rebolusyonaryo nga hilikuton ni Ka JM!

Pamatan-on, makigbahin sa NPA! *HP*

